

慎宜軒筆記十卷

不十

慎宜軒筆記卷六

桐城姚永概叔節

管子

牧民篇文巧不禁則民乃淫不瑋兩原則刑乃繁注兩原謂妄之原上無量也淫之原不禁文巧也案此四句承上文省刑之要在禁文巧二句而申言之兩原者卽指文巧文爲文靡巧爲奇巧立政篇工事競於刻鏤卽巧之謂女事繁於文章卽文之謂尹乃兼承上無量則民乃妄言不知上無量二句自承上文上服虔則六親固句也

形勢篇召遠者使無爲焉親近者言無事焉注遠使無爲所以優

遠方也案使謂使人也遠用使招之近用言親之今皆以爲末事耳注不可曉疑有誤

墜岸三伋人之所大難也而猿猱飲焉故曰伐矜好專舉事之禍也解以無求備之義釋上三句以任聖人之慮用衆人之力釋下二句則是各爲一義於故曰二字不合尹注猿過斷岸而能飲喻智者逢禍而能息又與伐矜好專不相涉案墜岸三伋言其高也而猿猱可下飲焉以喻伐矜好專者不可自恃其高而謂人莫我何也

怠倦者不及無廣者疑神神者在內不及者在門在內者將假在門者將待曙戒勿怠後稷逢殃朝忘其事夕失其功邪氣襲內正

色乃衰案神者在內六句後解無文尹注殊失書旨此十二句皆言勿怠之義張氏文虎讀無廣爲譌廣是也怠倦者作事常不及謀廣者作事每疑神神者苟入而在內則不及者自退出而在門言人能謀慮廣遠則精神常振怠倦之氣自消也假已也見曲禮天王登假注在內之疑神苟已焉則在門者又待而將乘之言志氣一衰怠倦旋至也曙戒勿怠正恐後稷逢殃耳朝忘其事四句所以重明勿怠之故邪氣入內正與神者在內相對

山高而不見地不易也解曰山物之高者也地險穢不平易則山不得見人主猶山也左右多黨比周以壅其主則主不得見案不得見者非不得見山也地險穢不易則山不可登以見萬物左右

壅閉則雖據人主之位亦不可以見萬情

權脩篇審其所好惡則其長短可知也觀其交游則其賢不肖可察也二者不失則民可得而官也注二者謂好惡交游也趙用賢曰二者賢不肖能察也案趙非尹注是但不應曰謂好惡交游當云知長短察賢不肖故民可得而官

使民偷壹注偷取一時之快案壹猶壹切漢書張敞傳注如淳說壹切謂權時也此亦謂偷用權時之法也

故功之不立名之不章爲之患者三有獨王者有貧賤者有日不足者注獨王謂無黨也案無黨何足爲患形勢篇獨王之國勞而多禍劉績依解謂當作獨任王念孫曰古任與王通因譌爲王此

獨王亦應爲獨王耳下文樹穀爲一年之計正承日不足而言樹木爲十年之計正承貧賤而言樹人爲百年之計正承獨任而言也

立政篇五屬大夫至都之日遂於廟致屬吏皆受憲案左傳凡邑有先君之主曰都孟子趙注邑有先君之宗廟曰都此五屬大夫所以得於廟布憲也

七法篇有水旱之功故能攻國救邑注謂其功可以爲彼水旱水旱之功者野不收耕不穫也注能令彼有水旱故不得使收穫也案功事也有水旱之功猶言有水旱之事故以野不收耕不穫解之注非

幼官篇五會諸侯令曰修春夏秋冬夏之常祭食天壤山川之故祀必以時尹以食字屬祭讀注云常所祭常所食案此食字當衍旣修常祭則食自在其中不必言矣天壤應作天地涉下以爾壤生物共玄官而誤

定方用勝案下交物因方則械器備句正承此文謂交易各國之良弓勁矢堅甲利兵也方用猶言方物矣

五輔篇朝廷兇而官府亂注云小人競進故兇小人用法故亂案兇讀如左傳曹人兇懼之兇田疇荒而國邑虛安得而不兇也

論語稱禹云菲飲食而致孝乎鬼神孟子飲食之人則人賤之矣荀子無恥而嗜飲食子張氏之賤儒也墨子言三代之窮民貪飲

食而惰從事管子亦云故善爲政者其庶人好耕農而惡飲食於是財用足而飲食薪菜饒不能爲政者其庶人好飲食而惡耕農於是財用匱而飲食薪菜乏由此觀之古人治國未有奢於飲食而能足用者也今則朱門酒肉臭路有凍死骨市肆之中廚館林立一席之費至數十金覺日食萬錢猶是寒儉而穀價日貴倉儲空乏豈尙能爲終日計乎讀管子至五輔篇廢書太息久之

宙合篇多備規軸者成軸也尹注規者正圓器大小悉須備二語是也而他文迂拙不可曉案軸體圓故多備規以成之耳夫成軸之多也其處大也不究王謂旋之誤是也其大小也不塞蓋言軸旣大小多備則大輪用大軸小輪用小軸莫不合宜入其中空不窳不塞

恆宜車筆言 卷一
矣猶迹求履之憲也尹注迹者履之所出是也此又申一譬言以
規成軸猶以迹求履之法大小亦適合也故接之曰夫焉有不適
尹乃以善字上屬爲句大謬善適善備也言所以善適者猶於善
備也善備卽多備也僊也是以無乏尹以僊爲輕順貌非也漢碑
遷多作僊此言旣善備多軸則遷之大遷之小無不有以供用是
以無乏也故諭教者取辟焉辟讀辟如行遠辟如登高之辟謂善
教者亦必多備教法隨其才之大小以成就之尹乃訓辟爲法又
多以施恩言之大失書旨

惠者知其不可兩守乃取一焉案惠讀慧知也論語好行小慧鄭
注魯論讀慧爲惠是二字可互讀也

博而不愾所以易政也案易平也讀如易繫辭易者使傾之易此與下所以險峻乃對丈夫天地一險一易句亦以險易相對尹注制禮作樂易古先政非也

聽不順不審不聰不審不聰則繆視不察不明不察不明則過慮不得不知不得不知則昏案此承上耳司聽聽必順聞聞審謂之聰目司視視必順見見察謂之明心司慮慮必順言言得謂之知而來則視下慮下均應有不順二字誤脫

言上之亡其國也常邇其樂立優美案立字不辭古私字作厶後人不知誤改作立耳所樂所私所優所美皆便辟佞幸之人也而常邇之故足以亡國

是以聖人明乎物之性者必以其類來也故君子繩繩乎慎其所
先案此乃總束上文之語天地萬物之橐也宙合有橐天地此二
句前目中語自連下文別爲一節尹注以故君子繩繩乎慎其所
先天地萬物之橐也二句連屬而合釋之大謬

樞言篇時也利也出爲之也案下文時者得天義者得人旣時且
義故能得天與人據此則利也當作義也尹注義卽利也是反據
上利字解下義字非是出爲之也當作由爲之也由出形近致誤
尹注先王有所出爲以出爲二字連讀尤謬

故德莫如先應適莫如後先王案先王字衍適卽敵字

人主好佚欲亡其身失其國者殆案旣亡其身失其國矣何殆之

足云亡讀爲忘失與及相近而譌好佚欲而忘身及國故殆也論
語一朝之忽忘其身以及其親與此文同

八觀篇故姦邪之所生生於匱不足匱不足之所生生於侈侈之
所生生於無度案旣曰匱又曰不足古人固有重文然上下文中
姦邪侈無度皆是單文此固無取乎重也不足二字當是匱字之
注誤入正文後人又於下句添不足二字耳

豪傑不安其位而積勞之人不懷其祿悅案下文積勞之人不懷
祿則兵士不用祿下無悅字此悅字當衍

法禁篇壹士以爲亡資修田以爲亡本王訂爲壹士禮增以爲己
資備田以爲己本是也下句則生之養私不死義不可通案漢陳

球碑工正作公正工可作公則公亦可作工此文本作工之養因
譌爲生之養之與不草書相近私不死乃私之死也古有田皆公
有備田以爲己本是公之養也聚士以爲己資是私之死也

重令篇虧令者死益令者死不行令者死留令者死不從令者死
案不行令留令皆屬官吏言不行者直不行之留令者但稽留之
而已然令固有失時而敗事故均死也若不從令則屬民言矣注
云令當行而故留之則不行與留爲一事管子何必分之乎

能不通於官受祿賞不當於功案能不通於官受義不可曉以上
文察身能而受官證之當作受官不通於能

諸侯失於外民亂於內天道也案自人心之變有餘則驕至此二

句文勢重疊而下皆言人心之變不應接以天道也三字天道當是失道涉上文天道之數而誤

法法篇兩一曰下其文與上畧同尹注管氏稱古言故曰一曰劉曰此乃集書者再述異聞案劉說是也墨子凡有上中下者其辭皆多同當是弟子各記所聞故旨同而字小異此亦然也然疑上一曰之辭止於令者人主之大寶也句顯然易知下一曰之辭當止於爲賢者之不至令之不行也句凡民從上也下又入正文凡論人而遠古者無高士焉尹注高士必順考古道也案遠古義不可通當作違古故尹以高士必順考古道釋之順字正是違字反面下德行成於身而違古卑人也俞以卑人也別爲句是也遠

亦違之誤

故列尊位重無以不受也勢利官大無以不從也以此事君此所謂誣能篡利之臣者也案兩無以之以當衍涉下以此而誤耳從讀如從政之從無不受無不從卽上所云誣能之人服事任官皆兼四賢舜禹契皋陶之能也尹注失之

昔者三代之相授也安得二天下而殺之尹注今之天下卽古之天下安有二天下而行其刑殺哉案殺與授字形相近非有二天下而授之者言卽此天下此得彼必失也

兵法篇徑乎不知發乎不意尹注徑謂卒然直指故敵不知案徑有疾義有直義卒然直指尹蓋兼用二義

進無所疑退無所匱敵乃爲用尹注旣無疑匱敵乃服從而爲己
用案下凌山阬不待鉤梯六句乃說士卒用命而此先言敵爲我
用文義不順此敵字乃士字之誤

寶不獨入故莫之能止寶不獨見故莫之能見尹注俘厥寶玉必
選精勇與俱故曰不獨入也又云與精勇俱見之寶玉所以禮神
使無水旱之災故取之不嫌也劉曰寶疑寶之誤雖曰獨入寶與
眾人之非獨也案尹固謬甚劉亦迂曲凡土地貨財皆寶也不必
事神之玉此言得敵之寶與眾共之不私人己故士用命莫之止
耳破敵之時凡其所寶人共見之莫能私斂藏耳此乃有節制之
師異乎後世將士爭趨府庫大掠者矣尹劉皆誤以獨入與上文

獨人同解故不得其說從爲之辭

縱三權案上縱強以制俞氏謂古字縱與從通此縱亦應讀從
大匡篇非夷吾莫容小白尹注小白旣無小智必乖迂於俗人故
非夷吾莫能容案莊子容成氏六韜作庸成氏容庸古通庸用也
非夷吾莫用小白耳何言容乎

百歲之後吾君卜世注謂僖公子小白等也案左傳卜世三十是
開國時卜其世數非繼嗣之人也況百歲之後所謂吾君卜世者
指何人乎此卜字當是下字脫爛耳下世卽言僖公薨矣

民病則多詐夫詐密而後動者勝詐則不信於民案詐密爲勝涉
上下二詐字誤衍上下文均言詐之不可用豈得以詐密爲勝道